

«Tuots braman da pudair filmar darcheu»

La cineasta Susanna Fanzun davart la situaziun actuala

FLURIN ANDRY/FMR

■ **Susanna Fanzun es la presidenta da las cineastas e cineasts independents rumantschs. La situaziun culla pandemia ha consequenzas eir per seis projet actual «Ils Giacometti».**

FMR: *Che significh la pandemia dal coronavirus pels projects e la lavur da las cineastas e dals cineasts? Vais vos insomma pudü lavurar l'on passà e quist on?*

Susanna Fanzun: Eir nosa lavur vain buollada da las circumstanzas extraordinarias in connex culla crisi da sandà. Plüs projects da film in lavur as tiran a l'inlunga. Adonta da quai sun gnüts realisats dal 2020 da las trais cineastas *Menga Huonder-Jenny, Ella Steiner* e da mai films documentars per l'emischiun Cuntrasts da Radiotelevisiun Svizra Rumantscha. Insomma sun las coproduziuns cun RTR da gronda valur per il film rumantsch.

«La malsgürezza pertoccond co finanziar ils films es gronda.»

L'on passà es gnüda realisada da *Carlo Beer* ed *Urs Berlinger* la prüma seria web ficziunala «Metta da fein». Il producent e redschissur *Ivo Zen* ha lantschà l'on passà, cuort avant il cunfinamaint, cun success il film da kino «Suot tschël blau». Uossa vegn el amo üna jada illas salas da kino cun quel film. *Herli Bundi* es activ sco producent sül nivel naziunal ed internaziunal. Actualmaing ha il producent plüs films a festivals e cul film documentar «Football inside» ün chi'd es güsta rivà illas salas da kino. Stilla pagina mirafilm.ch spordschan els eir l'opziun da verer ils films per lingia.

Voul quai dir cha'ls cineasts e cineastas pon agir darcheu sco üsità?

Na. I dà bainschi lavuors chi's po far, otras però sun impossiblas. Implü dependa fermamaing in che fasa cha'ls singles projects sun. Retscherchar e sviluppar ün projet es plütost pussibel, da filmar invezza es pel mumaint suvent impossibel. Eir la malsgürezza pertoccond co finanziar ils films es gronda. Fundaziuns ed instituziuns culturalas chi sustegnan films spettan cun respunder a dumondas per sustegn e quai significh chi s'es bloccà.

As sentis vos sustgnüts da vart da la politica?

Pellas cineastas e cineasts dal Grischun füssa impotent dad avair eir üna promozion da film definida. Illa debatta il Grond cussagl d'utun 2020 esa gnü dat ün signal positiv pella promozion da la cultura in general. In quella ha trattà il parlamaint grischun il concept davart la promozion da cultura. E la majorità da las deputadas e deputats til han sustgnü. Il büdsch è gnü augmantà dad ün sün trais milliuns francs per quatter ons, culla cundiziun cha'l preventiv chantunal gnia acceptà minch'on. Actualmaing vain structura-



La cineasta Susanna Fanzun in acziun.

FOTOS BEAT MÜLLER DSCHOINT VENTSCH

La famiglia Giacometti

La famiglia dals artists Giacometti da la Bergiaglia fascinescha a la cineasta *Susanna Fanzun* fingià daspö lösch. Da l'on 2001 vaiv'la fat, amo sco cineasta dad RTR, il film «Nos Alberto». Uossa però s'occupa la cineasta independenta da Scuol da tuot la famiglia Giacometti: Co esa gnü adaquella chi'd ha dat in üna pitschna val alpina üna dinastia d'artists cun renom internaziunal? Il bap dad Albeto, Giovanni Giacometti, d'eira eir artist. Ils frars Diego, Bruno e la sour Ottilia, tuots han lavurà da maniera creativa. Cun verer sün l'intera famiglia appara il plü cuntshaint da la famiglia, Alberto Giacometti, in üna nouva glüm. Il focus piglia Susanna Fanzun eir la rolla da la mamma Annetta chi nu d'eira svesa artista, ma chi ha giovà üna rolla importanta: «In quel sen es ella üna persuna principala zoppada», disch la cineasta. Il co-producent dal film da Susanna Fanzun es il cuntshaint cineast, redschissur e producent *Samir*, cun sia firma da produziun *Dschoint Ventschr*. Cur cha'l film sarà pront nun es amo cuntshaint: «Vezaran, eu di adüna, in ün, duos ons è'l sgür a fin», manzuna la cineasta cun ün surrir.



Tuots spettan da pudair lavurar darcheu sco plü bod

da la promozion da film. Quella prevezza da sustgnair il scriver scenaris, la produziun e la distribuzion da films. Quai sun perspectivias positivias.

Haja dat illa branscha da films eir da quels chi han profità da las restricziuns pervi da la pandemia?

«Che füs nosa cultura sainza nos films? Eir aint il pitschen daja grondas istorgias.»

Profità da la crisi da corona han impusüt ils gronds distribuors da films chi spordschan servezzans per verer films via lingia. Tschients da milliuns da francs sun its in cassas da gigants da «streaming» a l'ester. Ils gudogns van per gronda part i'ls Stadis Units. Quai va sün cuosts dal film svizzer. L'Associaziun svizra da redschia e da scenari da film s'ingascha perquai cun vevenza, cha 4% dals gudogns in Svizra gnian investits illa lavur da film indigena. Che füs nosa cultura sainza nos films? Eir aint il pitschen daja grondas istorgias. Ün film fat bain, cun paschiun, ingaschamaint e perseveranza es üna plüvalur culturala.

Co as preschantarà la situaziun quista stà, eir pels festivals da film?

Redschissuras e redschissuors, auturas ed autuors, producentas e producents, distribuziuns e kinos han da patir pel mumaint. Ils kinos e tscherts festivals sun stats creativs ed han sport la pussibilità da pudair verer films per lingia. Eir festivals da film han sport quell'opziun. Quai ha diminui ün zich il don economic. La situaziun as para da müdar plan a plan. Il grond festival da film a Locarno vegn organisà quista stà. Quist'eivna han publichà ils organisatuors, chi gnaran missas damain sopchas sülla Piazza Grande ed aint illas salas. Els sun però sgürs cha l'atmosfera sarà adüna amo magica. Che bella perspectiva.

L'intervista es gnüda fatta per scrit e per telefon

Per rinforzar il film rumantsch

Da l'on 2008 han cineastas e cineasts rumantschs fundà l'organizaziun «Cineasts Independents Rumantschs». Il böt da la CIR es da rinforzar il film rumantsch in general ed impusüt eir da promover sia preschentscha in otras regions linguisticas. L'uniun vain presidiada actualmaing da *Susanna Fanzun*, chaschiera es *Menga Huonder-Jenny* ed actura es *Manuela Schneider*. La CIR spordscha a seis vainch commembers e commembras cussagliaziun e sustegn in tuot las dumondas chi regardan la produziun d'ün film.

■ BIOSFERA



Il chantun sustegna il Reservat da biosfera in Engiadina e Val Müstair.

FOTO MAD CHANZLIA CHANTUNALA

Sustegn chantunal pel reservat da biosfera

(rtr/fmr) La regenza ha tut cugnuschentscha dal plan da management 2020-2024 dal Reservat da biosfera da l'UNESCO Engiadina Val Müstair. Ella garantischa üna contribuziun annuala da 150 000 francs pels ons 2021 fin 2024. Quai scriva la regenza in üna comunicaziun. Il Reservat da biosfera da l'UNESCO Engiadina Val Müstair (UBEVM) cumpiglia daspö l'on 2017 il Parc Naziunal Svizzer (la zona centrala), il parc da natüra Biosfera Val Müstair (zona da chüra e da svilup) e dad üna part dal terrain cumünal da Scuol (zona da chüra). Il secretariat da l'UBEVM realisescha minch'on differents projects, tarter oter ün projet per sviluppar inavant il reservat da biosfera. I vain examinada la pussibilità da til ingrondir integrond terrain da Valsot e Samignun.

LA QUOTIDIANA

Editura: Samedia Press AG
Editur: Hanspeter Lebrument
CEO: Thomas Kundert

Editura Samedia
Via Sommerau 32, 7007 Cuir;
tel. 081 255 50 50,
mail: verlag@samedia.ch

Redacziun responsabile:
Fundaziun Medias Rumantschas (FMR);
Schefredactor FMR: David Truttmann (dat)
Substitut schefredactor FMR:
Martin Cabalzar (mc)
Redacziun FMR:
Augustin Beeli (abc), Andreas Cadonau (ac),
Carmen Monn (cm), Daniela Derungs (dd),
Flurin Andry (fa, corrector),
Gabriela Desax (gd, corrector),
Annatina Felli (afi), Hans Huonder (hh),
Matia Demarmels (md), Nadja Lucchinetti (nl),
Sandro Buchli (sb), Susi Rothmund (sr),
Andri Netzer (an), Angelica Augustin (aa),
Martin Gabriel (mg), Tanja Augustin (ta).

Adressas redacziunalas:
FMR Fundaziun Medias Rumantschas,
Via da Masans 2, 7000 Cuir, tel: 081 544 89 10
mail: redacziun@fmr.ch

Surselva: tel. 081 544 89 18,
mail: redacziun@fmr.ch
Engiadina: tel. 081 544 89 16,
mail: redacziun@fmr.ch
Grischun Central: tel. 081 544 89 17
mail: redacziun@fmr.ch

Servetsch d'abunents e da distribuzion:
Via Sommerau 32, 7007 Cuir,
tel. 0844 226 226,
mail: abo@samedia.ch

Inserats:
Samedia Promotion,
Städtlistrasse 12, 7130 Glion
tel. 081 920 07 17, fax 081 920 07 18,
mail: ilanz.inserate@samedia.ch

La Quotidiana cumpara tschintg giadas ad emna
Ediziun derasada, Südosstschweiz complet:
69 795 exemplars (WEMF, 2020)
Derasaziun: 161 000 lecturas e lecturs
(MACH-Basic 2021-1)

Pretschs d'abunaments sut:
www.suedostschweiz.ch/aboservice

Comunicaziun da participaziuns considerablas
sin fundament da art. 322 CP:

nagin

© Samedia